

Visoki predstavnik poziva na “obračun sa birokratijom”

U govoru održanom jutros na seminaru u organizaciji Ekonomskog fakulteta u Sarajevu, visoki predstavnik, Paddy Ashdown, pozvao je građane BiH i njihove lidere da svoje napore usmjere na prijeko potrebne ekonomske reforme.

“Moramo se obračunati sa birokratijom,” rekao je visoki predstavnik. “Provesti revoluciju reformi. Moramo buldožerom proći kroz sistem da bismo se riješili prepreka koje uništavaju poduzetništvo.”

Visoki predstavnik je istakao svoju namjeru da ubrza ekonomsku reformu.

Rekao je da je uobičajena praksa birokrata i političara iz BiH da preduzećima otežavaju otvaranje novih radnih mjesta a time i podizanje životnog standarda. To objašnjava zašto je nezaposlenost tako visoka, zašto skoro polovina stanovništva živi na granici siromaštva: svaki peti građanin živi sa manje od 5 KM dnevno, a u Republici Srpskoj svaki četvrti. Primijetio je da nacionalno bogatstvo BiH iznosi manje od polovine njegovog prijeratnog nivoa, a strana ulaganja su na nižem nivou nego što je slučaj u bilo kom drugom dijelu srednje i istočne Evrope osim u Albaniji.

“Postoji mnogo razloga za takvu situaciju, međutim svi se svode na jednu stvar,” rekao je visoki predstavnik. “Niti u jednoj oblasti nismo izvršili ni dovoljnu niti dovoljno brzu reformu.”

Rekao je da u tržišnoj ekonomiji vlasti ne mogu otvariti radna mjesta dekretima, ali mogu osigurati pravni okvir kojim se olakšava pokretanje biznisa; mogu stvoriti jednostavnu i efikasnu poresku strukturu, i ukloniti prepreke kako bi poslovni sektor djelovao što slobodnije na tržištu. Na taj

način, vlasti stvaraju uvjete u kojima se radna mjesta otvaraju spontano.

Visoki predstavnik je rekao da sistem vlasti u BiH treba urediti tako da postane manji, jeftiniji i efikasniji. Javna uprava mora postati transparentna, sa više sluha, i finansijski racionalna. Sistem prikupljanja prihoda se mora osavremeniti, mora se uvesti moderan sistem PDV-a na državnom nivou, te provesti reforme "trulih carinskih uprava sklonih korupciji".

Visoki predstavnik je rekao da je izuzetno važno da ministri financija imenovani u novim organima vlasti budu ljudi najvećeg kalibra i integriteta, te apelovao na sve ministre da se svakog jutra upitaju: "Šta mogu učiniti danas kako bi ova zemlja postala bolje mjesto za biznis, u kojem će strani investitori biti dobrodošli?"

Visoki predstavnik je također pozvao građane BiH da preuzmu inicijativu u ekonomskoj reformi i da ne čekaju da to učine njihovi lideri. Apelovao je na potencijalne poduzetnike, rekavši: "Ako imate ambicija, ostvarite ih. Ako ste primijetili neiskorišten potencijal na tržištu, iskoristite ga. Ako ste ikada sanjali o tome da započnete samostalan biznis, da budete sam svoj gazda, poduzmite nešto i ostvarite taj san."